

বন্দী জেগে আছে

BANGLADARSHAN.COM  
সুনীল গঙ্গোপাধ্যায়

# গহন অরণ্যে

গহন অরণ্যে আর বারবার একা যেতে সাধ হয় না—

শুকনো পাতার ভাঙা নিশ্বাসের মতো শব্দ

তলতা বাঁশের ছায়া, শালের বল্পরী,

সরু পথ

কালভাটে, টিলার জঙ্গলে একা বসে থাকা কী-রকম নিরুৎসাহ বিষণ্ণ

বড় হিংস্র দুঃখময়।

অসংখ্য আত্মার মতো লুকোনো পাখী ও প্রাণী, অপার্থিব নির্জনতা

ফুলের সুবর্ণরেখা গন্ধ, সামনে ঢেউ উত্থাই—

অসহিষ্ণু জুতোর ভিতরে বালি, শিরদাঁড়া ব্যথা পেতে দ্বিধা করে

কেমনা বুকের মধ্যে চাপা হাওয়া, করতলে মুখ।

গহন অরণ্যে আর বারবার একা যেতে সাধ হয় না—

তবু যেতে হয়

বারবার ফিরে যেতে হয় ॥

BANGLADARSHAN.COM

# চিনতে পারোনি?

যে-কোনো রাস্তায় যে-কোনো লোককে ডেকে বলো,  
তুমি আমার বাল্যকালের খেলার সঙ্গী,  
মনে পড়ে না?

কেন তোমার ব্যস্ত ভঙ্গি?

কেন আমায় এড়িয়ে যাবার চঞ্চলতা!

আমার অনেক কথা ছিল, তোমার জামার বোতাম ঘিরে  
অনেক কথা

এই মুখ, এই ভুরুর পাশে চোরা চাহনি,

চিনতে পারো নি?

যে-কোনো রাস্তায় যে-কোনো লোককে ডেকে বলো,

আমি তোমার বাল্যকালের খেলার সঙ্গী

মনে পড়ে না?

আমরা ছিলাম গাছের ছায়া, ঝড়ের হাওয়ায় ঝড়ের হাওয়া  
আমরা ছিলাম দুপুরে রুম্ব

ছুটি শেষের সমান দুঃখ—

এই দ্যাখো সেই গ্রীবার ক্ষত, এই যে দ্যাখো চেনা আঙ্গুল

এখনো ভুল?

মনে হয় না তোমার সেই নিরুদ্দেশ সখার মতো?

কেন তোমার পাংশু চিবুক, কেন তোমার প্রতিরোধের

কঠিন ভঙ্গি

চিনতে পারো নি?

যে-কোনো রাস্তায় যে-কোনো লোককে ডেকে বলো,

শত্রু নই তো, আমরা সেই ছেলেবেলার খেলার সঙ্গী

মনে পড়ে না?

আমরা ছিলাম নদীর বাঁকে ঘূর্ণিপাকে সন্ধেবেলা

নিষিদ্ধ দেশ, ভাঙা মন্দির, দু'চোখে ধোঁয়া

দেবী মানবীর প্রথম দ্বিধা, প্রথম ছোঁয়া, আমৃত্যু পণ

গোপন গ্রন্থে এক শিহরণ, কৈশোরময় তুমুল খেলা...

লুকোচুরির খেলার শেষে কারুকে খুঁজে পাইনি

দ্যাখো সে মুখ, চোরা চাহনি

একই আয়না

চিনতে পারো না?

BANGLADARSHAN.COM

# ছায়ার জন্য

গাছের ছায়ায় বসে বহুদিন, কাটিয়েছি

কোনোদিন ধন্যবাদ দিইনি বৃক্ষকে

এখন একটা কোনো প্রতিনিধি বৃক্ষ চাই

যাঁর কাছে সব কৃতজ্ঞতা

সমীপেষু করা যায়।

ভেবেছি অরণ্যে যাব—সমগ্র সমাজ থেকে প্রতিভূ বৃক্ষকে খুঁজে নিতে

সেখানে সমস্তক্ষণ ছায়া

সেখানে ছায়ার জন্য কৃতজ্ঞতা নেই

সেখানে রক্তিম আলো নির্জনতা ভেদ করে খুঁজে নেয় পথ

মুহূর্তে আড়াল থেকে ছুটে আসে কপিস হিংস্রতা

গাঢ় অন্ধকার হলে আমি অসতর্ক অসহায়

জানু পেতে বসে বলবো

বহুদিন ছায়ায় কেটেছে এ জীবন—

হে ছায়া, আমারই হাতে তোমার ধ্বংসের মন্ত্র

বুকের ভিতরে ছিল শ্বাস—তার পরিক্রমা ঘূর্ণি দুনিয়ায়

ভূতলে অশুভ শব্দ, আঁচের মতন লাগে পাতার বীজন—

তবু শেষবার

পুরোনো কালের মতো বন্ধু বলে ডাকো

বকল বসন দাও, দাও রসসিক্ত ফল, দ্বিধাহীন হয়ে একটু শুয়ে থাকি

শেষ প্রহরের আগে

এই হত্যাকারী হাতে শেষবার প্রণাম জানাই।

BANGLADARSHAN.COM

# দুটি অভিশাপ

সমুদ্রের জলে আমি থুতু ফেলেছিলাম  
কেউ দেখেনি, কেউ টের পায়নি  
প্রবল ঢেউ-এর মাথায় ফেনার মধ্যে  
মিশে গিয়েছিল আমার থুতু  
তবু আমার লজ্জা হয়, এতদিন পর আমি শুনতে পাই  
সমুদ্রের অভিশাপ।

মেল ট্রেনের গায়ে আমি খড়ি দিয়ে ঝঁকেছিলাম  
নারীর মুখ  
কেউ দেখেনি, কেউ টের পায়নি  
এমনকি, সেই নারীরও চোখের তারা আঁকা ছিল না  
এক স্টেশন পার হবার আগেই বৃষ্টি, প্রবল বৃষ্টি  
হয়তো বৃষ্টির জলে ধুয়ে গিয়েছিল আমার খড়ির শিল্প  
তবু আমার লজ্জা হয়, এতদিন পর আমি শুনতে পাই  
মেল ট্রেনের অভিশাপ।

প্রতিদিন পথ চলা কি পথের বুক পদাঘাত?  
নারীর বুক দাঁত বসানো কি শারীরিক আক্রমণ?  
শীতের সকালে খেজুর-রস খেতে ভালো-লাগা  
কি পোশাক সমাজের প্রতিনিধি হওয়া?  
প্রথম কৈশোরে সরস্বতী-মূর্তিকে আলিঙ্গন করা কি পাপ?  
এ-সব বিষয়ে আমি মনস্থির করতে পারিনি  
কিন্তু আমি স্পষ্ট শুনতে পাই  
সমুদ্র ও মেল ট্রেনের অভিশাপ!

# একদিন...

একদিন তোমার হাত ধরে জয়পুরের রাস্তা দিয়ে বেড়াবো,  
অসমাণ্ড পাহাড়কে বলবো, আমরা এসেছি।

একটা শুকনো নদীর গর্ভে নেমে গিয়ে মরা ঝাঁঝি

হাতে তুলে নিয়ে বলবো, মনে আছে

ঝাড়লগ্ননের বিচ্ছুরিত আলোর মতন আনন্দ খেলা করবে শরীরে।

কোনদিন জয়পুর যাইনি কিন্তু জানি কোথায় জয়পুর আছে—

চিনতে আমার ভুল হবে না।

ধ্বংসস্তুপের মাঝখানে একটা ভয়হীন মিনারে ঠেস দিয়ে

হাওয়া থেকে আঁচল ফিরিয়ে আনবে তুমি

তোমার মকর-মুখো সুবর্ণ কঙ্কনে রিনিঝিনি শব্দ উঠলে

আমি লীয়মান সূর্যরশ্মির দিকে তাকিয়ে বলবো,

এবার অম্মা মন্দিরে সাতটা ঘণ্টা বাজবে

শুধু শব্দ নয়, তার প্রতিধ্বনি, শুধু অর্জন নয়, তার উপহার

ফিরে আসবে তখন, কে যেন বলবে, জানতাম!

মর্মরে প্রতিফলিত মুখশ্রী প্রশ্ন করবে, সত্যি, সব মনে আছে?

আমি সবকটা বোতাম খুলে হেসে বলবো,

বাঃ, জলের ধারে বসে থাকার ছবি কখনো মুছে যায়?

প্রতিটি নিশ্বাস দীর্ঘ—এইরকম দুঃখহীন খুশীর মধ্যে

হাত ধরাধরি করে ছুটতে ছুটতে শুনতে পাবো

রাজপুতানীদের মান-ভাঙার গান

কেউ উচ্চারণ করবে না, তবু সবাই বলবে,

আঃ, কি সুন্দর বেঁচে আছি, উড়বে লাল রঙের ধুলো

এক মুহূর্তের জন্য সমস্ত ম্তেরাও জেটে উঠে ধন্যবাদ দিয়ে যাবে

পাথুরে সবল রাস্তা যেখানে বাঁক ঘুরে ঢালু হয়ে নেমেছে

সেখানে আমরা থমকে দাঁড়ালে ভেসে আসবে তরতাজা দৃশ্যের স্বাণ

ময়ূরের আত্মীয়ের মতন সন্ধ্যা অকস্মাৎ উল্লসিত হয়ে ঘোষণা করবে

এই নাও, আজ এই জয়পুর তোমাদের।

# অনন্ত মুহূর্ত

মধ্যাহ্ন-বাগানে এসে ঝুঁকে আছে সাতফুট আলো  
আমি জানি

ওখানে শয়তান দাঁড়িয়ে নেই।

আমার বাঁ পাশে একটি বাজে পোড়া আমলকী বৃক্ষ

তাকে আমি গোপনে হিন্তাল বলে ডাকি

তার নিচে অতি স্বচ্ছ দর্পণ গোপ্পদ

ওখানে অঙ্গুরীরা খেলা করে না

সাতফুট স্থির আলো, আমি জানি

ওখানে কেউ দাঁড়িয়ে নেই।

এখন সকালবেলা অপরাংশে মেঘ ছায়া মেঘ

পাগলাটে একদল পাখি ঝগড়া করে মাটিতে লুটোয়

ফের উড়ে যায়, ওরা

নিহত আমলকী গাছে কখনো বসে না

লাল টিপ ফুলের ঝাড়ে ব্রাহ্মণ গরুটি খুব নিঃশব্দ

আমি চেয়ে আছি পুবে, ওদিকে দেয়াল ভাঙা,

পলস্তারা খসা

বাগানে উত্তর গেটে কখন এসেছে এক নারী, এলোচুল

বাঁ হাত রেলিঙে ভর

দুকবে কি দুকবে না সেই দ্বিধায় মুখশ্রী তার রহস্যময়

গভীর নিশ্বাসে তার দুই স্তন ফুলে উঠে কানকানি করে

আমি তাকে এক পলক দেখে ফের চোখ রাখি

ভাঙা দেয়ালের দিকে

সেখানে কিছুই নেই—

আপাতত এই আমার অনন্ত মুহূর্ত।



# বাণী-বন্দনা

জাগো, জেগে ওঠো বাণী, আজ অন্ধকার, আজ  
বড় বেশী তপ্ত অন্ধকার, আজ জাগার সময়  
ওরে বিষের পুত্তলি, তোর এত ঘুম?  
পয়োমুখ বিষের ছুরির মতো জিভ, ঐ বিষ দৃষ্টি  
ঐ দেহ-বল্লরীর বিষ ঘাম, এ সবই তো এখন আঁধারে  
মানুষের প্রাণ চায়; বাণী, কুহকিনী  
আচমকা দুয়ার খুলে প্রেমিক ও পূজারিকে নীল করো  
কবির দু-কোণে ঢালো প্রার্থিত গরল আর শ্রেষ্ঠী কিংবা  
রাজপুরুষের  
ব্যাকুল ঠোঁটে ও মুখে ছোবলের মতো চুমু, লুক্ক প্রতিহারী  
তোমার উন্মুখ স্তনে মুখ দিয়ে টানে গুপ্তবিষ, বিষ, বিষ  
অন্ধকার বিষে ভরে যাক  
বাণী, ওরে বিষকন্যা, তোর নগ্ন শরীরের দুলে ওঠা মোহিনী মায়ায়  
অ্যারিস্টটলকে তুই ঘোড়া কর, সূর্যকে ক্রভঙ্গি হেনে  
শিরোপালোভীকে দুই পদাঘাত উপহার দিয়ে  
প্রগাঢ় তামসে তোর নাচের উৎসব শুরু হোক।  
আজি মনে হয়  
বাণী, তোর জেগে ওঠা সভ্যতার একমাত্র সূচিকাভরণ।

# চিঠি

ভৌতিক পিওন যবে খেলাচ্ছিলে পার হয় রাসবিহারী মোড়  
আমার হুকুমে সব গাড়ি থেকে থাকে

লাল আলো, লাল আলো, ঐ শোনো কণ্ঠস্বর  
ঐ দ্যাখো অশ্বথের বাঁকা ডাল নুয়ে আছে বিদ্যুতের দিকে  
ঘূর্ণিবাতাসের মধ্যে চিঠি উড়ে যায়।

হিমালী স্তব্ধতা ভেঙে নেমে এলো অলৌকিক রোদ  
বহু থেকে এক হলো একটি রমণী

তার

রূপালি স্তনের পাশে

ভবঘুরে তিনটে ফড়িং!

বৃক্ষ ও মানুষ শোভাযাত্রা করে এসেছিল, জানি

সব থেমে গেছে

এ তোমার এ আমার বিশেষ মুহূর্ত নয়

পৃথিবী সমস্তক্ষণ সর্বজনীন না

এখন একজন শুধু রক্তিম আলোর নিচে

চিঠি পাবে।

BANGLADARSHAN.COM

# নীরার অসুখ

নীরার অসুখ হলে কলকাতার সবাই বড় দুঃখে থাকে  
সূর্য নিভে গেলে পর, নিয়নের বাতিগুলি হঠাৎ জ্বলার আগে জেনে নেয়

নীরা আজ ভালো আছে?

গীর্জার বয়স্ক ঘড়ি, দোকানের রক্তিম লাবণ্য-ওরা জানে

নীরা আজ ভালো আছে!

অফিস সিনেমা পার্কে লক্ষ লক্ষ মানুষের মুখে মুখে রটে যায়

নীরার খবর

বকুলমালার তীব্র গন্ধ এসে বলে দেয়, নীরা আজ খুশী

হঠাৎ উদাস হাওয়া এলোমেলো পাগলা ঘণ্টি বাজিয়ে আকাশ জুড়ে

খেলা শুরু করলে

কলকাতার সব লোক মৃদু হাস্যে জেনে যায়, নীরা আজ বেড়াতে গিয়েছে।

আকাশে যখন মেঘ, ছায়াছন্ন গুমোট নগরে খুব দুঃখ বোধ।

হঠাৎ ট্রামের পেটে ট্যান্সি ঢুকে নিরানন্দ জ্যাম চৌরাস্তায়

রেস্তোরাঁয় পথে পথে মানুষের মুখ কালো, বিরক্ত মুখোস

সমস্ত কলকাতা জুড়ে ক্রোধ আর ধর্মঘট, শুরু হবে লণ্ডভণ্ড

টেলিফোন পোস্টাফিসে আগুন জ্বালিয়ে

যে-যার নিজস্ব হৃৎস্পন্দনেও হরতাল জানাবে—

আমি ভয়ে কেঁপে উঠি, আমি জানি, আমি তৎক্ষণাৎ ছুটে যাই, গিয়ে বলি,

নীরা, তুমি মন খারাপ করে আছো?

লক্ষ্মী মেয়ে, একবার চোখে দাও, আয়না দেবার মতো দেখাও ও মুখের মঞ্জুরী

নবীন জনের মতো কলহাস্যে একবার বলো দেখি ধাঁধার উত্তর!

অমনি আড়াল সরে, বৃষ্টি নামে, মানুষেরা সিনেমা ও খেলা দেখতে

চলে যায় স্বস্তিময় মুখে

ট্রাফিকের গিট খোলে, সাইকেলের সঙ্গে টেম্পো, মোটরের সঙ্গে রিক্সা

মিলেমিশে বাড়ি ফেরে যে-যার রাস্তায়

সিগারেট ঠোঁটে চেপে কেউ কেউ বলে ওঠে, বেঁচে থাকা নেহাৎ মন্দ না!

# মুক ব্যবহার

নিজের গলার স্বর যন্ত্রে শুনবো, ঐ যন্ত্র বলবে ‘ভালোবাসি’  
আর কেউ বলেনি, আমি কারুকে বলিনি।  
আয়নার ভিতর দিয়ে চুরি করে গেছি বহুবার  
স্বর্গের পোস্ট অফিসে সন্কেবেলা  
কেউ কিছু লেখেনি; যন্ত্র, তুমি বলো, ‘ভালোবাসি।’

মানুষ হয়েছে আজ নিষ্ঠুর না বিষম লাজুক?  
কেউ কারুর মুখের দিকে চোখ তুলে চায় না কথা বলে না  
মাঝে মাঝে ওষ্ঠ খুলে অনুবাদে হাসাহাসি হয়—  
চোখ জ্বলে যায় ঘুমে—ঘুমের ভিতর দ্বিপ্রহর,  
এসো তুমি, ঘুমোবে আমার ঘরে বুকের মতন এক শীতলপাটিতে  
একথা বলে না আর কেউ—

কুমারীর হাত ধরে হেঁটে যাই দীঘির উপরে  
বাঁকা জ্যোৎস্না বুক ভেদ করে যায়—তবুও স্তব্ধতা, বড় স্মৃতিকষ্ট হয়,  
‘ফিরে এসো’—এই ধ্বনি বারবার গুমরে গুমরে ওঠে।

যন্ত্রের সম্মুখে সব স্বীকারোক্তি হয়ে যায়, একা  
মধ্যরাত্রি হু-হু করে, অবিন্যস্ত দীর্ঘ কেশভার,  
পাশের পালঙ্কে ঘুমে আছো তুমি, ক্লান্ত মুখ, বসন শিথিল  
খুলেছে সায়ার গিট, চোখের দু’পাশে একটু ছায়া, তুমি  
ঘুমোও এখন, আমি জাগাবো না—

ভালোবাসা, অবিশ্বাস—দু’জনেই আজ এত মুক  
প্রতিবাদও করে না আজ গম্ভীর গর্জনে  
প্রেম যেন মুখ থেকে চলে যায় শরীরের সহস্র আঙুলে  
মায়া লাগে,  
অথচ বুকের মধ্যে কথা ছিল, ঘুম থেকে ডেকে ওঠাবার সাধ ছিল,  
যন্ত্র, তুমি একদিন সাক্ষী দিও।

# আথেন্স থেকে কায়রো

বিমানের মধ্যে টাই খুলে ফেলে, সিট্ বেল্ট সরিয়ে  
উঠে দাঁড়ানুম

চিৎকার করে বললুম কে কোথায় আছো?  
পেঁজা তুলোর মতন তুলতুলে মুখ দু'জন হওয়া-সখী ছুটে এলো-  
তখন মাথার ওপর ও নিচে ভূমধ্য আকাশ এবং রূপালি সাগর

মাঝখানে নীল মেঘ ও রূপালী ফড়িং  
পিছনে সন্ধেবেলার ইওরোপ জ্বলছে দাও দাও আগুনে  
সামনে প্রাচ্যদেশ জুড়ে অন্ধকার

আমি কর্কশভাবে বললুম, কোথায় থাকে এতক্ষণ, আমি  
আধঘণ্টা আগে পানীয় চেয়েছি,  
তা-ছাড়া আমার খিদে পেয়েছে-

বালিকা-সাজা দুই যুবতী অপ্রতিভ ভাবে হাসলো  
সেই আগুন ও অন্ধকারের মাঝখানে নারী-হাস্য খুব অবান্তর লাগে  
তাদের শরীরের রেখা-বিভঙ্গের দিকে চোখ পড়ে না  
ভূমধ্য সাগরের অন্তরীক্ষে নিজেকে বন্ধনমুক্ত ও সরল সত্যবাদী

মনে হয় অকস্মাৎ-

পিছনে জ্বলন্ত ইউরোপ, সামনে ভস্মসাৎ কালো প্রাচ্যদেশ  
এর মাঝখানে দাঁড়িয়ে আমি নিঃসঙ্গ ভারতীয়, আমি সম্রাটের পুত্র  
সমস্ত পৃথিবীর উদ্দেশ্যে এখন আমি তীব্র কণ্ঠে বলতে চাই,

আমার খিদে পেয়েছে, আমার খিদে পেয়েছে,

আমি আর সহ্য করতে পারছি না-

আমি কামড়ে ছিঁড়ে চিবিয়ে খাবার জন্য উদ্যত হয়েছি।

# ডাকবাংলোতে

ফুটে উঠলো একটি দুটি টগর

কণ্ঠে মুক্তা মালা

মরি মরি

তোমরা আজ সকালবেলার প্রসন্নতা

এক মুহূর্ত শিশির ভেজা আলো

নর্মহলে তোমরা অঙ্গরী।

‘কী সুন্দর ঐ টগর ফুল দুটো—

খোঁপায় গুঁজবো আমি!’

প্রাক্-যুবতী বারান্দার প্রান্তে এসে আঁখি তুললো—

সদ্য ভোর, বিরল হওয়া, ঠাণ্ডা রোদ

সাংকেতিক পাখির ডাক, উপত্যকায় নির্জনতা

আমি বেতের ইজিচেয়ারে অলস।

ফুলের থেকে চোখ ফিরিয়ে নারীর দিকে

চোখই জানে চোখের মায়া দৃষ্টি জানে সৃষ্টির পূর্ণতা

একটি চাবি যেমন বহু বন্দী মুক্তি,

চাবির মতন

একপলকের চেয়ে দেখা

বললো আমায়:

নারী যতই রূপসী হোক, এই মুহূর্তে মুকুটহীনা।

চেয়ার ছেড়ে উঠে, বারান্দা থেকে নেমে

টগর গাছের পাশে দাঁড়িয়ে

আমি হাত বাড়িয়েছি

হাত থেমে রইলো শূন্যে

পৃথিবী কাঁপে না, তবু কখনো কখনো মানুষের

ভূমিকম্প হয়

এত বাতাস, তবু দীর্ঘশ্বাস নিতে ইচ্ছা হয় না

ভুবনময় এই মোহিনী আলোর মধ্যে দুলে ওঠে বিষণ্ণতা

হাত থেমে রইলো শূন্যে

BANGLADARSHAN.COM

টগর গাছের পাশে হলুদ সাপ  
চোখে চোখ, হিম সম্ভাষণ  
কী তথ্য এনেছো তুমি, প্রহরি?  
হলুদ সাপ সকালের মূর্তিমতী স্তম্ভতাকে ভেঙে  
সেই ভাঙা গলায়  
বলে উঠলো:  
ঘূর্ণী জলের পাশে একদিন দেখে নিও  
মুকের ছায়ায় রৌদ্র-ভ্রমরীর খেলা!

BANGLADARSHAN.COM

# কেউ কথা রাখেনি

কেউ কথা রাখেনি, তেত্রিশ বছর কাটলো, কেউ কথা রাখেনি  
ছেলেবেলায় এক বোষ্টুমী তার আগমনী গান হঠাৎ থামিয়ে বলেছিল  
শুক্রা দ্বাদশীর দিন অন্তরাটুকু শুনিয়ে যাবে  
তারপর কত চন্দ্রভূক অমাবস্যা চলে গেলো, কিন্তু সেই বোষ্টুমী  
আর এলো না  
পঁচিশ বছর প্রতীক্ষায় আছি।

মামা বাড়ির মাঝি নাদের আলি বলেছিল, বড় হও দাদাঠাকুর  
তোমাকে আমি তিন প্রহরের বিল দেখাতে নিয়ে যাবো  
সেখানে পদাফুলের মাথায় সাপ আর ভ্রমর  
খেলা করে!

নাদের আলী, আমি আর কত বড় হবো? আমার মাথা এ ঘরের ছাদ

ফুঁড়ে আকাশ স্পর্শ করলে তারপর তুমি আমায়

তিন প্রহরের বিল দেখাবে?

একটাও রয়্যাল গুলি কিনতে পারিনি কখনো

লাঠি-লজেন্স দেখিয়ে দেখিয়ে চুষেছে লঙ্করবাড়ির ছেলেরা

ভিখারীর মতন চৌধুরীদের গেটে দাঁড়িয়ে দেখেছি

ভিতরে রাস-উৎসব

অবিরল রঙের ধারার মধ্যে সুবর্ণ কঙ্কণ পরা ফর্সা রমণীরা

কত রকম আমোদে হেসেছে

আমার দিকে তারা ফিরেও চায়নি!

বাবা আমার কাঁধ ছুঁয়ে বলেছিলেন, দেখিস, একদিন, আমরাও...

বাবা এখন অন্ধ, আমাদের দেখা হয়নি কিছুই

সেই রয়্যাল গুলি, সেই লাঠি-লজেন্স, সেই রাস-উৎসব

আমায় কেউ ফিরিয়ে দেবে না!

বুকের মধ্যে সুগন্ধি রুমাল রেখে বরণা বলেছিল,

যেদিন আমায় সত্যিকারের ভালবাসবে

সেদিন আমার বুকেও এ-রকম আতরের গন্ধ হবে!



ভালোবাসার জন্য আমি হাতের মুঠোয় প্রাণ নিয়েছি  
দূরন্ত ষাঁড়ের চোখে বেঁধেছি লাল কাপড়  
বিশ্বসংসার তন্ন তন্ন করে খুঁজে এনেছি ১০৮টা নীল পদ  
তবু কথা রাখে নি বরণা, এখন তার বুকুে শুধুই মাংসের গন্ধ  
এখনো সে যে-কোনো নারী!  
কেউ কথা রাখেনি, তেত্রিশ বছর কাটল, কেউ কথা রাখে না!

BANGLADARSHAN.COM

## শব্দার্থ

এখন ইস্কুল বন্ধ, বালক সীমান্তে যায় চাল কিনতে  
চালের বাজারে বড় খুনসুটি, চালের ভিতরে বহু হাত  
চোখ ও নিশ্বাসময়, পাথর ও কীট-ভরা, তবুও সুগন্ধ;  
বালকের ভীৰু হাতে থলি খোলে, চেয়ে দেখে ওজনের কাঁটা-  
জলস্থল অন্তরীক্ষ আগ্রহে প্রত্যক্ষ করে বালকের সুশিক্ষার দৃশ্য  
পুলিশকে সিকি দিতে তারাই শিথিয়ে দেয়, ওপরে চায়াপ সজনে ডাঁটা  
মেঠো পথে ফিরে আসে। সুবোধ বালক, তুমি ও চাল খেয়ো না,  
বিক্রি করো, কিলো-তে আটানা লাভ, সেই ভালো, শোনো,  
চাল হলো শব্দ, তার অর্থ জেনে নিয়ে হাতে না তুললে  
শিক্ষা অসমাপ্ত থাকে, শব্দ নয় অর্থই তো শিক্ষার মহিমা।  
এখন ইস্কুল বন্ধ, তবু দিন দিন বাড়ে বালকের সুশিক্ষার সীমা।

BANGLADARSHAN.COM

# নদীর ওপারে

নদীর ওপারে ও কে? ও কি মৃত্যু? দাঁড়িয়ে রয়েছে

মুখে ভেজা হিম হাসি

হিরণ্য, ওকে বলো, আমি আর পাশা খেলতে ভালোবাসি না

হিরণ্য, ওকে বলো, আমি এই সন্ধ্যা একটু গাঢ় হলে

নদীতে আচমন সেরে যজ্ঞে বসবো

হিরণ্য, ওকে বলো, আমি এই সন্ধ্যা একটু গাঢ় হলে

আগুনে ঘিয়ের ছিটে দিয়ে তুলবো প্রলয় নিনাদ—

নদীর ওপারে ও কে? ও কি মৃত্যু? দাঁড়িয়ে রয়েছে

মুখে ভেজা হিম হাসি

হিরণ্য, ওকে বলো, শর্বাণীর চবুকে ঐ যে কাটা ঘা

ভনভনাচ্ছে নীল ডুমো মাছি

ওরা কি মৃত্যুর দূত? আমি আর পাশা খেলতে ভালোবাসি না—

নদীতে আচমন সেরে যজ্ঞে বসবো

ওকে শেষবার বলো, রাত্রির আগেই যেন নীল ডুমো মাছিদের ঝাঁক

উড়ে যায় প্রত্যাশের দিকে!

BANGLADARSHAN.COM

# মাটি

বাগানখানি ফুলদানি, হাওয়ায় সেই ধাতু এবং কুসুমগন্ধ  
ফুলদানিটা উলটে রাখো, সোজা করো, মাটির নিচে ঘুমিয়ে থাক  
বাগানখানি

পায়ের নিচে মাটি ছুঁয়েছি, অথবা পা, তোমারই পা  
আমার পায়ের নিচে রাখো, আমার শরীর মাটি-মাটি  
আমি গায়ে ময়লা হয়ে মিশে থাকবো, সেও তো মাটি,  
মাটি হলেই বাগান, তোমার ফুলদানিটা উল্টে রাখো,  
সোজা করো,

আমি তোমার নোখের ধুলো, ভুরুর ঘাম, টিপের উল্টো পিঠের আঠা  
কখনো সোজা, কখনো উল্টো, কখনো টিপ, কখনো আঠা!  
শ্যাওলা পাতার কারুকার্য দেখে তোমার স্নানের ঘরে জ্বলুক বাতি  
বাতি জ্বলুক হাজার হাজার লক্ষ লক্ষ

ঘরের ঘর, আলোর আলো  
ফুলদানিটা উল্টে রাখো, সোজা করো, অন্ধকারও লাগবে ভালো  
বাগান ভেঙে লগুভগু, এত অসংখ্য উল্কাবৃষ্টি

ফুলদানিটা উল্টে রাখো, সোজা করো, আবার বৃষ্টি শেষের মাটি  
মাটি হলেই বাগান, আমি নোখের ধুলোয় মিশে থাকবো, সেও তো মাটি।

# ছেলেটা

ঐ ছেলেটা পাগল,

ওর কথার কোনো মাথামুণ্ডু, ঠিকানা নেই!

ঐ ছেলেটা সমুদ্রেরও সীমানা চায়,

নদীর কাছে হাজির হয়ে

নদীকে খুব সরল হতে মিনতি করে;

ভিখারীকেও ত্যাগ শেখাতে চেয়েছিল, ঐ ছেলেটা এমন পাগলা,

মৃত্যু দেখে শৈশবে যায়,

লেবু পাতার গন্ধে নাকি অমরত্ব!

নারীর বুকে শপথ রেখে ভেবেছিল, পাখির মতন পবিত্র প্রেম

হাওয়ায় উড়বে

হাওয়ায় উড়বে চোখের জল, যুদ্ধ যেমন মানুষকে খুব

হাসিয়ে মারে,

ঐ ছেলেটা মানুষ দেখলে ধুলো কাদায় ছবি আঁকবে

ধুলো কাদায় ছিটিয়ে বলবে, ভালোবাসতে চেয়েছিলাম,

পৃথিবীময় গোপন কথা, পৃথিবীময় গোপন কথা

অসুখ, সুখ, জননীমুখ, আকাশবাণী, ভোরের কাগজ

ভরিয়ে শুধু গোপন কথা

আলিঙ্গনে এত গোপন, রাজধানীতে এত গোপন

মানুষভরা গোপনতার ভিতর থেকে বেরিয়ে এসে ঐ ছেলেটা

বিষের ভাঙ নিয়ে বিমান থেকে শূন্যে লাফিয়ে পড়ে

শূন্য থেকে ঘুরতে ঘুরতে, আকাশ, হিম-বাতাস থেকে

চোখ সরিয়ে

সভ্যতাকে ডেকে বলে—

ঐ ছেলেটা সভ্যতাকে হাসতে হাসতে ডেকে বলে,

আমায় অধঃপতন থেকে রক্ষা করো!

# অরূপ রাজ্য

মায়ের গোলাপ গাছে ঠিক একটি গোলাপের মতো ফুল

ফুটে আছে

চোখের মতন চোখে দেখতে পাই ভোরবেলার মতো ভোরবেলা—

দেশলাই কাঠিতে জ্বললো বিশুদ্ধ আগুন, আমি সিগারেট মুখে নিয়ে

ছাদ থেকে নেমে আসি প্রধান মাটিতে

পায়ের তলায় ভিজে ঘাস, ঠিক পায়ের তলায় ভিজে ঘাস।

দুঃখ নিয়ে ঘুম ভাঙলে দুঃখ জেগে রয়, মানুষ ঘুমোয় ফের

প্রহরীর বিবৃত জানুতে

মানুষ না, আমি। আমার ঘুমন্ত চলা সাম্প্রতিক বাতাসকে মনে করে

শতাব্দীর হাওয়া

মহিলাকে মনে করে স্বপ্ন। মহিলা না, নীরা।

তার দৃষ্টি দুর্গাটুনটুনি হয়ে উড়ে যায়। স্বপ্ন

তার স্তনে মল্লিকা ফুলের ঘ্রাণ। স্বপ্ন

নীরার হাসির তোড়ে চিকন কণার শব্দ ওঠে। এও স্বপ্ন—

টুনটুনি, মল্লিকা, বর্না—ধূল্যবলুণ্ঠিত এই পৃথিবীর

অসীম ফসল হয়ে ফুটে আছে

যেমন ফসল নীরা। আমি। দুঃখে সব স্বপ্ন হয়।

ঈর্ষাও ঘুমের ভঙ্গি। সেই ঈর্ষা নারী বা নীরার সর্বশরীরের কাছে এসে

শিকলের শব্দ করে

আমার দু চোখ তীক্ষ্ণ ছুরি হয়, প্রাসাদ শিখর ভাঙে,

ধ্বংস করে রাজনীতি-মঞ্চ, রূপান্তর শুরু হয়

মানুষকে মনে হয় জলজন্তু, যৌষিৎপ্রত্যঙ্গ যেন খাদ্য

ভালোবাসা নুন-মরীচ, নিশ্বাসে আগুন

প্রতিটি প্রত্যুষ যেন রাত্রি ভোর, রোদ্দুর তখনই হয় ক্ষুরের ফলার মতো

কুসুম কুমারী, মেঘ দুঃসময়-সব স্বপ্ন!

কখনো দুঃখের ঘুম শুরু হলে আমি জাগি, অবিকল চোখের মতন চোখে

টের পাই সাম্প্রতিক হাওয়া

সিগারেটে টান মেরে আমি খুসখুসে শব্দে হাসি

বেঁচে থাকা এই রকম

আমি এই অরুপ রাজ্যের নাগরিক

গোলাপ চারার ঠিক গোলাপ ফোটার মতো দৃশ্যমান ফসলের নিজস্ব বিভাস  
পায়ের তলায় ভিজে ঘাস শুধু পায়ের তলায় ভিজে ঘাস।

BANGLADARSHAN.COM

# ভালোবাসা

ভালোবাসা নয় স্তনের ওপরে দাঁত?  
ভালোবাসা শুধু শ্রাবণের হা-হতাশ?  
ভালোবাসা বুঝি হৃদয় সমীপে আঁচ?  
ভালোবাসা মানে রক্ত চেটেছে বাঘ!

ভালোবাসা ছিল ঝর্ণার পাশে একা  
সেতু নেই আকাশে পারাপার  
ভালোবাসা ছিল সোনালি ফসলে হাওয়া  
ভালোবাসা ছিল ট্রেন লাইনের রোদ।

শরীর ফুরোয় ঘামে ভেসে যায় বুক  
অপর বাহুতে মাথা রেখে আসে ঘুম  
ঘুমের ভিতরে বারবার বলি আমি

ভালোবাসাকেই ভালোবাসা দিয়ে যাবো।

BANGLADARSHAN.COM



# জয়ী নই, পরাজিত নই

পাহাড়-চুড়ায় দাঁড়িয়ে মনে হয়েছিল

আমি এই পৃথিবীকে পদতলে রেখেছি

এই আক্ষরিক সত্যের কাছে যুক্তি মূর্ছা যায়।

শিহরিত নির্জনতার মধ্যে বুক টনটন করে ওঠে

হাল্কা মেঘের উপছায়ায় একটি ম্লান দিন

সবুজকে ধূসর হতে ডাকে

আদিগন্ত প্রান্তর ও টুকরো ছড়ানো টিলার উপর দিয়ে

ভেসে যায় অনৈতিহাসিক হাওয়া

অরণ্য আনে না কোনো কস্তুরীর ঘ্রাণ

কিছু নিচে ছুটন্ত মহিলার গোলাপি রুমাল উড়ে গিয়ে পড়ে

ফণীমনসার ঝোপে

নিঃশব্দ পায়ে চলে যায় খরগোশ আর রোদ্দুর।

এই যে মুহূর্তে, এই যে দাঁড়িয়ে থাকা—এর কোনো অর্থ নেই

ঝর্না জলে ভেসে যায় সম্রাটের শিরস্রাণ

কমলার কোয়া থেকে খসে পড়া বীজ ঢুকে পড়ে পাতাল গর্ভে

পোল্কা ডট দুটি প্রজাপতি তাদের আপন আপন কাজে ব্যস্ত

বাবলা গাছের শুকনো কাঁটাও দাবী করেছে প্রকৃতির প্রতিনিধিত্ব।

সব দৃশ্যই এমন নিরপেক্ষ

আমি জয়ী নই, আমি পরাজিত নই, আমি এমনই একজন মানুষ

পাহাড় চুড়ায় পৃথিবীকে পদতলে রেখে, আমার নাভিমূল

থেকে উঠে আসে বিষণ্ণ, ক্লান্ত দীর্ঘশ্বাস

এই নির্জনতাই আমার ক্ষমাপ্রার্থী অশ্রুমোচনের মুহূর্ত।

# পাথর

খণ্ড পাথর, শৌখিনতায় তুই কি চাস সজীব হয়ে উঠে দাঁড়াতে?  
অথবা তোর ভিতরে, অনেক ভিতরে, শিশুর রক্তাভ হাত যেমন কোমল  
সেই কেন্দ্রে  
অযুত বর্ষ সুপ্ত রয়েছে যে স্তব্ধতা, তাকেই অটুট রাখার নেশা  
ঢের বেশী বড়?

BANGLADARSHAN.COM

# বাড়ি ফেরা

রাতির সাড়ে বারোটায় বৃষ্টি, দুপুরে অত্যন্ত শুকনো এবং ঝকঝকে  
ছিল পথ, মেঘ থেকে কাদা ঝরেছে, খুবই দুঃখিত মূর্তি একা  
হেঁটে যাচ্ছে রাস্তা দিয়ে, কালো ভিজে চুপচাপ দ্বিধায়  
ট্রাম বাস বন্ধ, রিকশা ট্যাক্সি পকেটে নেই, পৃথিবী তল্লাসী হয়ে গেছে  
পরশুদিন

পুলিশের হাতে শান্তি এখন, অথবা নির্জনতাই প্রধান অস্ত্র এই  
বুধবার রাত্তিরে।

অনেক মোটরকারে শব্দ হয় না, ঘুমন্ত হেড লাইট, শুধু পাপপুণ্য  
অত্যন্ত সশব্দে জেগে আছে, কতই তো প্রতিষ্ঠান উঠে যায়, ওরা শুধু  
ঘাড়হীন অমর গৌয়ার।

মশারী ব্যবসায়ীদের মুণ্ডপাত হচ্ছে নর্দমায়, কলকণ্ঠে, ঘুমহীন ঘুম  
শিখে নিয়েছে ট্রাক ড্রাইভার। দু'পাশের আলো-জ্বলা অথবা

অন্ধকার ঘরগুলোয়

জন্মনিয়ন্ত্রণ জনপ্রিয় হয়নি। অসার্থক যৌন ক্রিয়ার পর  
বারান্দায় বিড়ি খাচ্ছে বুড়ো লোকটা, ঘন ঘন আগুনের চিহ্ন দেখে  
বোঝা যায় কি তীব্র ওর দুঃখ! মৃত্যুর খুব কাছাকাছি—

হয়তো লোকটা

গত দশ বছর ধরে মরে গেছে, আমি বেঁচে আছি আঠাশ বছর।

সাত মাইল পদশব্দ শুনে কেউ পাগলামির সীমা ছুঁয়ে যায় না  
এ রাস্তা অনন্তে যায়নি, ডানদিকে বেঁকে কামিনী পুকুরে  
দুই ব্রীজের নিচে জল, পাংলুন গোটানো হলো, এই ঠাণ্ডা স্পর্শ  
একাকী মানুষকে বড় অনুতাপ এনে দেয়—

লাইট পোস্টে উঠে বালব চুরি করছে একজন, এই চোট্টা, তোর পকেটে  
দেশলাই আছে?

বহুক্ষণ সিগারেট খাইনি। তাই একা লাগছে, দেশলাইটা নিয়ে নিলাম  
ফেরত পাবি না

বালব চুরি করেই বাপু খুশী থাক না, দুরকম আলো বা আগুন  
এক জীবনে হয় না!...ভাগ্ শালা,...

ওপাশে নীরেনবাবুর বাড়ি, থাক। এ সময় যাওয়া চলে না-ডাকাতের

ছদ্মবেশ ছাড়া

চায়ের ফরমাস করলে নিশ্চয়ই চা খাওয়াতেন, তিনদিন পরে

অন্য প্রসঙ্গে ভর্ৎসনা

একটু দূরে রিটার্ডার্ড জজসাহেবের সুরম্য হর্ম্যের

দেয়াল চকচকে সাদা, কি আশ্চর্য, আজো সাদা! টুকরো কাঠকয়লায়

লিখে যাবো নাকি, আমি এসেছিলাম, যমদূত, ঘুমন্ত দেখে ফিরে গেলাম

কাল ফের আসবো, ইতিমধ্যে মায়াপাশ ছিন্ন করে রাখবেন নিশ্চয়ই!

কুত্তারা পথ ছাড়! আমি চোর বা জোচ্চোর নই, অথবা ভূত প্রেত

সামান্য মানুষ একা ফিরে যাচ্ছি নিজের বাড়িতে

পথ ভুল হয়নি, ঠাণ্ডা চাবিটা পকেটে, বন্ধ দরজার সামনে থেমে

তিনবার নিজের নাম ধরে ডাকবো, এবং তৎক্ষণাৎ সুইচ টিপে

এলোমেলো অন্ধকার সরিয়ে

আয়নায় নিজের মুখ চিনে নিয়ে বারান্দা পেরিয়ে ঢুকবো ঘরে।

BANGLADARSHAN.COM

# নীরার হাসি ও অশ্রু

নীরার চোখের জল অনেক চোখের অনেক

নীচে

টল্‌মল্‌

নীরার মুখের হাসি মুখের আড়াল থেকে

বুক, বাহু, আঙুলে

ছড়ায়

শাড়ির আঁচলে হাসি, ভিজে চুলে, হেলানো সন্ধ্যায় নীরা

আমাকে বাড়িয়ে দেয়, হাস্যময় হাত

আমার হাতের মধ্যে চৌরাস্তায় খেলা করে নীরার কৌতুক

তার ছদ্মবেশ থেকে ভেসে আসে সামুদ্রিক ঘ্রাণ

সে আমার দিকে চায়, নীরার গোধূলি মাখা ঠোঁট থেকে

ঝরে পড়ে লীলা লোধ

আমি তাকে প্রচ্ছন্ন আদর করি, গুপ্ত চোখে বলি:

নীরা, তুমি শান্ত হও

অমন মোহিনী হাস্যে আমার বিভ্রম হয় না, আমি সব জানি

পৃথিবী তোলপাড় করা প্লাবনের শব্দ শুনে টের পাই

তোমার মুখের পাশে উষ্ণ হাওয়া

নীরা, তুমি শান্ত হও!

নীরার সহাস্য বুকো আঁচলের পাখিগুলি

খেলা করে

কোমর ও শ্রোণী থেকে স্রোত উঠে ঘুরে যায় এক পলক

সংসারের সারাৎসার ঝলমলিয়ে সে তার দাঁতের আলো

সায়াহের দিকে তুলে ধরে

নাগকেশরের মতো গুপ্তধরে আঙুল ঠেকিয়ে বলে,

চুপ!

আমি জানি

নীরার চোখের জল চোখের অনেক নিচে টল্‌মল্‌॥

# ইচ্ছে

কাঁচের চুড়ি ভাঙার মতন মাঝে মাঝেই ইচ্ছে করে  
দুটো চারটে নিয়ম কানুন ভেঙে ফেলি  
পায়ের তলায় আছড়ে ফেলি মাথার মুকুট  
যাদের পায়ের তলায় আছি, তাদের মাথায় চড়ে বসি  
কাঁচের চুড়ি ভাঙার মতই ইচ্ছে করে অবহেলায়  
ধর্মতলায় দিন দুপুরে পথের মধ্যে হিসি করি।  
ইচ্ছে করে দুপুর রোদে ব্লাক আউটের হুকুম দেবার  
ইচ্ছে করে বিবৃতি দিই ভাঁওতা মেরে জনসেবার  
ইচ্ছে করে ভাঁওতাবাজ নেতার মুখে চুনকালি দিই।  
ইচ্ছে করে অফিস যাবার নাম করে যাই বেলুড় মঠে  
ইচ্ছে করে ধর্মাধর্ম নিলাম করি মুর্গীহাটায়  
বেলুন কিনি বেলুন ফাটায়, কাঁচের চুড়ি দেখলে ভাঙি  
ইচ্ছে করে লগুভগু করি এবার পৃথিবীটাকে  
মনুমেন্টের পায়ের কাছে দাঁড়িয়ে বলি  
আমার কিছু ভাল্লাগে না।

BANGLADARSHAN.COM

# জলের সামনে

ব্রিজের অনেক নিচে জল, আজ সেইখানে ঝুঁকেছে মানুষ  
কখনো মানুষ হয়ে উঠি আমি,

কখনো মানুষ নই,

তবুও সক্ষ্যায়

ব্রিজের খিলান ধরে ঝুঁকে থেকে মনে হয় অবিকল মানুষেরই মতো  
মানুষের জল দেখা, জলের মানুষ দেখা

পরস্পর মুখ;

মানুষ দেখেছে জল বহুদিন মানুষ দেখেছে অশ্রুজল

মানুষ দেখেছে মুখ অশ্রুভেজা ব্রিজের অনেক নিচে

হিম কালো জলে

কালো জল বহু উর্ধ্ব দেখেছে কান্নায় সিক্ত গোপন কঠিন মুখ

মানুষের মতো।

আ-সমুদ্র দয়াপ্রার্থী আবার বৃষ্টির কাছে অতি পলাতক  
কখনো নিখর জলে স্পষ্ট মুখ, কখনো তরঙ্গে ভাঙা হীন মানবীয়।

জলের কিনারে এলে জলের ভিতরে যাওয়া, জলের ভিতরে

মানুষ যখনই যায় একা, তার অলঙ্ঘ্য শরীর

মাতৃগর্ভ বাস সম অগোপন;

অথবা না-হোক এক,

বন্ধু ও সঙ্গিনী

অদূরেই জলযুদ্ধে; একবার ডুব দিয়ে মীনচোখে দেখা

নারীর উরুর জোড়, খোলা স্তন কী-আশ্চর্য সরল—

জলেরই মতন সেও সজল, নীলের কালো,—সংখ্যাতিত জিভে

জল তার সর্ব অঙ্গ লেহন করেছে, ঠিক যে-রকম

মানুষের হাত

জলের ভিতরে গিয়ে নিজের শরীরটাকে চিনে নেয়,

জলের ভিতরে

সহাস্যে পেছাপ করে লজ্জাহীন বাতাসের মতো জল, পরাগ ছড়ায়।

কখনো মানুষ সেজে বীরায়-বাস্কেট নিয়ে বসেছি নারীর

কাছাকাছি সন্ধুতটে সন্ধেবেলা, জ্যোৎস্না ভাঙে লাবণ্য হাওয়ায়  
আকাশে অসংখ্য ছিদ্র, ঢেউয়ের চুড়ায় জ্বলে ফস্ফরাস  
দেখেছিল মুখ

অথবা ঢেউয়ের দল মানুষের মুখ চেয়ে সার বেঁধে আসে—  
এমন উচ্ছল জল, মানুষের মুখ দেখা যেন তার আশৈশব সাধ।  
মানুষের ছদ্মবেশে আছি, তাই চোখে আসে অশ্রু  
মুখ ঢাকি।

BANGLADARSHAN.COM



# জীবন ও জীবনের মর্ম

জীবন ও জীবনের মর্ম মুখোমুখি দাঁড়ালে

আমি ভুল বুঝতে পারি

আমার ক্ষমা চাইতে ইচ্ছে হয়।

বুদ্ধের বুদ্ধের হাঁস হানা ঝাঁপটায়, আমি মাংসলোভী

বিশাল বৃক্ষের ছায়া জলে ভাসে—আমি তমস্বান হয়ে ছুটে গেছি

আমি ভুল বুঝতে পারি—

বিস্মৃতিকে কতবার মনে ভেবেছি বিষণ্ণতা

ট্রেন লাইনের পাশে এসে থমকে দাঁড়িয়েছে বনবাসী হরিণ

কয়লা খনির ভিতরের অপরাহ্নের মতন উদাসীনতা

আমাকে নদীর পাশেও স্রোতহীন রেখেছে

চঞ্চল হাওয়ায় উড়ে গেছে কৃতঘ্নতার হাসি

আমি ভুল বুঝতে পারি

আমার ক্ষমা চাইতে ইচ্ছা হয়!

জীবন ও জীবনের মর্ম মুখোমুখি দাঁড়ালে, সেই মুহূর্তের

বিশাল জ্যোৎস্না যাবতীয় পার্থিব ম্যাজিকের

তাঁবুর মতন ঝড়ে উল্টে যায়

মেঘ জলস্তু হতে গিয়েও ফেটে ইলশেঙুড়ি হয়ে ছড়ায়

সমগ্র কৈশোর কালের নদীর পার থেকে ছিটকে পড়ে যায়

গুন টানার মানুষ

বারো বছরের জন্মদিনে আমার কপালে মায়ের আঙ্গুল ছোঁয়া

লাল টিপ

মুছে গিয়েছিল কান্নায়, মুছে যায়নি।

এখন আমার ভরতবর্ষের মতন ললাটে সেই কাশ্মীর, অর্থাৎ দ্বিধা

আমি ভুল বুঝতে পারি

আমার ক্ষমা চাইতে ইচ্ছা হয়।

## শব্দ

বালি ঝুমকো, হলুদ নাভি, শূন্য হাস্য  
রূপালি ফল, নীল মিছিল, চিড়িক চক্ষু...

চিড়িক না সুখ? চিড়িক শব্দে ঢাঁড়া বসালুম  
রূপালি ফল, না রূপালি উরুত? দ্বিদিম জ্যোৎস্না  
অমনি আমার বুকের মধ্যে ভয়ের ঘণ্টা, দ্বিদিম জ্যোৎস্না  
লিখে ভয় হয়

দ্বিদিম না স্মৃতি? জ্যোৎস্না না জল? অথবা সাগর?  
দ্বিদিম সাগর? ঠিক ঠিক ঠিক! নিরুপদ্রব। শূন্য হাস্য  
কুনকি কাফেলা, হাতেম তামস, শালু পালু লুস  
তামস? আবার ভুলের শব্দ, ভয়ের শব্দ, (কাটতে কলম  
থর থর করে)

তামসের চেয়ে প্রগাঢ় আমার গরিমার কাছে শূন্য হাস্য  
অথের এত বিভ্রমে বহু অশ্রুবিন্দু, কুলুকুলু জল...  
কুলুকুলু বড় মধুর শব্দ, মধুর তোমার শব্দে শব্দ  
মন্দিরে বাজে দ্বিদিম ঘণ্টা, জ্যোৎস্না উধাও, তামস উধাও।

BANGLADARSHAN.COM

# নিসর্গ

আমলকী গাছে ঠেস দিয়ে আছে শীত  
উড়ে গেল তিনটে প্রজাপতি  
একটি কিশোরী তার করমচা রঙের হাত মেলে দিলে বিকেলের দিকে  
সূর্য খুশী হয়ে উঠলেন, তাঁর পুনরায় যুবা হতে সাধ হলো।

BANGLADARSHAN.COM

# দ্বারভাঙা জেলার রমণী

হাওড়া ব্রীজের রেলিং ধরে একটু ঝুঁকে দাঁড়িয়েছিল  
দ্বারভাঙা জেলা থেকে আসা টাটকা রমণী  
ব্রীজের অনেক নিচে জল, সেখানে কোনো ছায়া পড়ে না  
কিন্তু বিশাল এক ভগবতী কুয়াশা কলকাতার উপদ্রুত অঞ্চল থেকে  
গড়িয়ে এসে

সভ্যতার ভূমধ্য অলিন্দে এসে দাঁড়ালো  
সমস্ত আকাশ থেকে খসে পড়লো ইতিহাসের পাপমোচনবারী বিষণ্ণতা  
ক্রমে সব দৃশ্য, পথ ও মানুষ মুছে যায়, কেন্দ্রবিন্দুতে শুধু রইলো সেই  
লাল ফুল-ছাপ শাড়ি জড়ানো মূর্তি

রেখা ও আয়তনের শুভবিবাহমূলক একটি উদাসীন ছবি—

আকস্মাৎ ঘুরে দাঁড়ালো সে, সেই প্রধানা মচকা মাগি, গোঠের মল বামড়ে

মোষ তাড়ানোর ভঙ্গিতে চেঁচিয়ে উঠলো, ইঃ রে-রে-রে-রে—

মুঠো পিছলোনো স্তনের সূর্যমুখী লঙ্কার মতো বাঁটায় ধাক্কা মারলো কুয়াশা  
পাছার বিপুল দেলানিতে কেঁপে উঠলো নাদব্রহ্ম  
অ্যাক্রোপলিসের থামের মতো উরুতের মাঝখানে

ভাটফুলের গন্ধ মাখা যোনির কাছে থেমে রইল কাতর হওয়া

ডৌল হাত তুলে সে আবার চেঁচিয়ে উঠলো, ইঃ রে-রে-রে-রে—

তখন সর্বনাশের কাছে সৃষ্টি হাঁটু গেড়ে বসে আছে

তখন বিষণ্ণতার কাছে অবিশ্বাস তার আত্মার মুক্তিমূল্য পেয়ে গেছে...

সব ধ্বংসের পর

শুধু দ্বারভাঙা জেলার এই রমণীই সেখানে দাঁড়িয়ে রইলো

কেননা ঐ মুহূর্তে সে মোষ তাড়ানোর স্বপ্ন দেখছিল।

# উত্তরাধিকার

নবীন কিশোর, তোমায় দিলাম ভূবনডাঙার মেঘলা আকাশ

তোমাকে দিলাম বোতামবিহীন ছেঁড়া শার্ট আর

ফুসফুস-ভরা হাসি

দুপুর রৌদ্রে পায়ে পায়ে ঘোরা, রাত্রির মাঠে চিৎ হ'য়ে শুয়ে থাকা

এসব এখন তোমারই, তোমার হাত ভ'রে নাও আমার অবেলা

আমার দুঃখবিহীন দুঃখ ক্রোধ শিহরণ

নবীন কিশোর, তোমাকে দিলাম আমার যা-কিছু ছিল আভরণ

জ্বলন্ত বুক কফির চুমুক, সিগারেট চুরি, জানালার পাশে

বালিকার প্রতি বারবার ভুল

পরুষ বাক্য, কবিতার কাছে হাঁটু মুড়ে বসা, ছুরির ঝলস্

অভিমাণে মানুষ কিংবা মানুষের মত আর যা-কিছুর

বুক চিরে দেখা

আত্মহনন, শহরের পিঠ তোলপাড় করা অহংকারের দ্রুত পদপাত

একখানা নদী, দু'তিনটে দেশ, কয়েকটি নারী—

এ-সবই আমার পুরোনো পোষাক, বড় প্রিয় ছিল, এখন শরীরে

আঁট হয়ে বসে, মানায় না আর

তোমাকে দিলাম, নবীন কিশোর, ইচ্ছে হয় তো অঙ্গে জড়াও

অথবা ঘৃণায় দূরে ফেলে দাও, যা খুশী তোমার

তোমাকে আমার তোমার বয়সী সব কিছু দিতে বড় সাধ হয়।

# নীরার পাশে তিনটি ছায়া

নীরা এবং নীরার পাশে তিনটি ছায়া  
আমি ধনুকে তীর জুড়েছি, ছায়া তবুও এত বেহায়া  
পাশ ছাড়ে না  
এবার ছিলা সমুদ্যত, হানবো তীর ঝড়ের মতো—  
নীরা দু’হাত তুলে বলবো, ‘মা নিষাদ!  
ওরা আমার বিষম চেনা!’  
ঘূর্ণি ধুলোর সঙ্গে ওড়ে আমার বুক চাপা বিষাদ—  
লঘু প্রকোপে হাসলো নীরা, সঙ্গে ছায়া-অভিমানীরা  
ফেরানো তীর দৃষ্টি ছুঁয়ে মিলিয়ে গেল  
নীরা জানে না!

BANGLADARSHAN.COM

# বন্দী, জেগে আছো?

চরাচরে অন্ধকার, নিঃশব্দ নিশীথে ডাক ওঠে:

বন্দী, জেগে আছো?

বন্দী কি ঘুমোয়? না কি জাগরণই তার বন্দিশালা

মাথার ভিতরে জ্বালা যাবজ্জীবন পল অনুপল

পদক্ষেপে শিকলের শব্দ—তার নিঃসঙ্গতা, অন্ধকুঠুরির

ভিতরে স্বপ্নের মতো রোদ এসে

জানায় অস্তিত্ব, এ কি নির্ভূরতা—যে রয়েছে চিরকাল

জেগে, তাকে প্রশ্ন

বন্দী, জেগে আছো!

যে রয়েছে চিরকাল জেগে তার হিংস্র কঠিন মুখ

গরাদের ফাঁকে চেয়ে থাকে, তবু কপালের নিচে

প্রশ্নের জ্বলন্ত দুই শর;

সমূহ প্রকৃতি থেকে যে রয়েছে দূরে তাঁর আঁধারে ঝলসানো চোখ

প্রেমের নিভৃত শিল্পে, পণ্যে, পিপাসায়, লোভে

অত্যন্ত ঘুমন্ত সব মানুষের খেলাঘরে

প্রতিপ্রশ্ন ছুঁড়ে দেয়:

স্বাধীন? স্বাধীন?

# সিক্রিতে এক উৎসবে

নর্তকী, তুমি তাকাও আমার দিকে ক্ষণকাল  
আজ এ সভায় আমিই প্রধান অতিথি, আমার  
চোখে চোখ রাখো একবার।

সবুজ আলোর পরে ঝলসালো মসৃণ মঅভ  
দুই সখী এসে দাঁড়ালো দু'পাশে লাল ও হলুদ

ওরা তো স্বপ্ন

রেশমী রুমাল, পীত আঙুরাখা, জরির ঝালর—এসব স্বপ্ন  
প্রহরীর মতো ঘাঘরা কাঁচুলি সাজানো মঞ্চ—এসব স্বপ্ন  
বাহু ঢাকা ফুল, ফুলের দুকুল রূপোর নুপুর—এবারও স্বপ্ন?  
শুধু ঘোরে রং, ঝাম-ঝাম-ঝুম রঙের শব্দ, নর্তকী, তুমি  
তাকাও আমার দিকে ক্ষণকাল, আজ এ সভায়  
আমিই প্রধান অতিথি, আমার  
চোখে চোখ রাখো একবার।

শত জনতার ঠিক মাঝখানে আমার আসন, নর্তকী, তুমি  
যে দিকেই যাও, প্রোসেনিয়ামের যে-কোনো সীমায়—  
আমার দু'চোখ তোমার অঙ্গে—লীলাময় হাত, মৃদু অঙ্গুলি—  
লঘুপদযুগ, ক্ষীণ কটিতট দারুণ দোলানি দেখে উরুদেশ  
হেম দুই বুক জেগে ওঠে আজ স্তননে বর্ণনাচ কি শিল্প?  
ঝাম-ঝাম-ঝুম রঙের শব্দ, নর্তকী আজ তুমিই শিল্প?  
এক মুহূর্ত ফেরাও চক্ষু আমার দু'চোখে, ছবির নারীরা  
ঠিক যে রকম চিরকাল শুধু আমাকেই দেখে, এক মুহূর্ত  
তুমি দেখা দাও, আজ এ সভায় তুমিই শিল্প।

উইংসে এসেছে রাজার কুমার, সেও তো রমণী,  
ছোট শহরের নৃত্যসভায় সবাই রমণী, ওকে ভয় নেই  
সাত সখী এসে তিনজন গেল, নর্তকী শুধু তুমিই শিল্প  
দুই ভুরু হেনে একবার চাও, শরীর দেখেছি, তোমাকে দেখিনি  
নাচ কি শিল্প? ঢের শিল্পের দেখা হলো আজ

চোখাচোখি ছাড়া কোনো দেখা নেই



এক মুহূর্ত তাকাও...আমার সহিষ্ণুতার শেষ হয়ে এলো  
এবার চেয়ারে দাঁড়িয়ে উঠবো, সিটি দিয়ে আমি ডিগবাজি খাবো  
মাটিতে গড়িয়ে হামাগুড়ি দিয়ে উলটে পালটে লোভী জনতার  
সারি সারি পায়ে চিমটি কাটবো

নাচ কি শিল্প? ঢের শিল্পের দেখা হলো আজ মঞ্চ শিল্প  
এবার সেসব ভাঙা শুরু হোক, শরীর দেখেছি তোমাকে দেখিনি  
হাওয়া ভাঙে মেঘ, মেঘ কি শরীর? শরীর আমার সহ্য হয় না  
শিল্প আমার সহ্য হয় না, স্বপ্নের মতো বুঝবুঝে রং,

এক মুহূর্ত

দুই চোখে শুধু আমাকেই দেখো, আমি আজ বড় অস্তির আছি  
আমি আজ এক নক্ষত্রকে হৃদয় সঁপেছি  
নর্তকী তুমি সুন্দর, আমি তোমাকে চাই না, তোমার চোখের  
নক্ষত্রকে খুঁজে নিতে দাও।

BANGLADARSHAN.COM

# আত্মা

প্রতিটি ট্রেনের সঙ্গে আমার চতুর্থভাগ আত্মা ছুটে যায়  
প্রতিটি আত্মার সঙ্গে আমার নিজস্ব ট্রেন অসময় নিয়ে  
খেলা করে।

আলোর দোকানে আমি হাজার হাজার বাতি সাজিয়ে রেখেছি  
নষ্ট-আলো সঞ্জীবনী শিক্ষা করে আমার চঞ্চল  
অহমিকা।

জাদুঘরে অসংখ্য ঘড়িতে আমি অসংখ্য সময় লিখে রাখি  
নারীর উরুর কাছে আমার পিপড়ে দূত ঘোরে ফেরে  
আমারই ইঙ্গিতে তারা চুম্বনের আগে  
কেঁপে ওঠে।

এইরূপ কর্মব্যস্ত জীবনের ভিতরে-বাইরে ডুবে থেকে  
বিকেলের অমসৃণ বাতাসে হঠাৎ আমি দেখি  
আমার আত্মার একটা কুচো টুকরো  
আজও কোনো কাজ পায়নি।

BANGLADARSHAN.COM

# ইন্দিরা গান্ধীর প্রতি

প্রিয় ইন্দিরা, তুমি বিমানের জানলায় বসে,

গুজরাটের বন্যা দেখতে যেও না

এ বড় ভয়ঙ্কর খেলা

দ্রুদ জলের প্রবল তোলপাড়ে উপড়ে গেছে রেললাইন

চৌচির হয়েছে ব্রীজ, মৃত পশুর পেটের কাছে ছন্নছাড়া বালক

তরঙ্গে ভেসে যায় বৃদ্ধের চশমা, বৃক্ষের শিখরে মানুষের

আপৎকালীন বন্ধুত্ব

এইসব টুকরো দৃশ্য—এক ধরনের সত্য, আংশিক, কিন্তু বড় তীব্র

বিপর্যয়ের সময় এই সব আংশিক সত্যই প্রধান হয়ে ওঠে

ইন্দিরা, লক্ষ্মীমেয়ে, তোমার এ-কথা ভোলা উচিত নয়

মেঘের প্রাসাদে বসে তোমার করুণ কণ্ঠস্বরেও

কোনো সার্বজনীন দুঃখ ধ্বনিত হবে না

তোমার শুকনো ঠোঁট, কতদিন সেখানে চুম্বনের দাগ পড়েনি,

চোখের নিচে গভীর কালো ক্লান্তি, ব্যর্থ প্রেমিকার মতো চিবুকের রেখা

কিন্তু তুমি নিজেই বেছে নিয়েছো এই পথ

তোমার আর ফেরার পথ নেই

প্রিয়দর্শিনী, তুমি এখন বিমানের জানলায় বসে

উড়ে এসো না জলপাইগুড়ি, আসামের আকাশে

এ বড় ভয়ঙ্কর খেলা

আমি তোমাকে আবার সাবধান করে দিচ্ছি—

উঁচু থেকে তুমি দেখতে পাও মাইল মাইল শূন্যতা

প্রকৃতির নিয়ম ও নিয়মহীনতার সর্বনাশা মহিমা

নতুন জলের প্রবাহ, তেজে স্রোত—যেন মেঘলা আকাশ উল্টো

হয়ে শুয়ে আছে পৃথিবীতে

মাঝে মাঝে দ্বীপের মতন বাড়িও কাণ্ডহীন গাছের পল্লবিত মাথা

ইন্দিরা, তখন সেই বন্যার দৃশ্য দেখেও একদিন তোমার মুখ ফস্কে

বেরিয়ে যেতে পারে, বাঃ, কী সুন্দর!

# শরীর অশরীরী

কেউ শরীরবাদী বলে আমায় ভৎসনা করলে, তখনই ইচ্ছে হয়  
অভিमानে অশরীরী হয়ে হাওয়ায় মিলিয়ে যাই।  
আবার কেউ ‘অশরীরী’ শব্দটি উচ্চারণ করলে আমি কান্নার মতন  
ভয় পেয়ে তীব্র কণ্ঠে বলি, শরীর, তুমি কোথায়? লুকিও না  
এসো, তোমাকে একটু ছুঁই!  
এই রকমই জীবন ও মানুষের হাঁটা চলার ভাষা—  
সুতরাং ‘ভাষা’ শব্দটি কারুর মুখে শুনলে মনে হয় পৃথিবীর  
যাবতীয় ক্ষত্রিয় গদ্যের  
বিনাশ করে যেতে হবে।

কোথাও ‘ব্রাহ্মণ’ শুনলে মনে পড়ে ভাঙা মৃৎ-শকটের জন্য কান্না  
এ-সবই তো আকাশের নিচে, তোমার মনে পড়ে না?  
দেখো, আবার ‘তুমি’ বলছি, অর্থাৎ শরীর  
এখন আমি শরীরবাদী না অশরীরী?  
অশরীরী, অশরীরী, তাই তো শরীর ছুঁতে ইচ্ছে হয়,  
এসো শরীর, তোমায় আদর করি  
এসো শরীর, তোমায় ছাপার অক্ষরের মতো স্পষ্টভাবে চুম্বন করি  
তোমায় সমাজ-সংস্কারের মতন আদর্শভাবে আলিঙ্গন করি  
এসো, ভয় নেই, লজ্জা করো না, কেউ দেখবে না—দেখতে জানে না  
সত্যবতী, তোমার দ্বীপের চারপাশ আমি ঢেকে দেবো কুয়াশায়  
তোমার মীনচিহ্নিত দেহে ছড়িয়ে দেবো যোজনব্যাপী গন্ধ—  
কবিও তো সন্ন্যাসীই, সন্ন্যাসীরই মতন সে হঠাৎ কখনো  
যোগভ্রষ্ট হয়ে কামমোহিত হয়—  
সেই বিস্মৃত মুহূর্তের লিপ্সা বড় তীব্র, তাকে অপমান করো না  
যে যখন জ্যোৎস্নাকে ভোগ করতে চায়, তখন উন্মত্তের মতন  
লণ্ডভণ্ড করে রাত্রি, সে যখন পৃথিবীকে দেখে, তখন  
দশ আঙুলের মতন ভয়াবহ চোখে এই শৌখিন ধরিত্রীর সঙ্গে  
সঙ্গম করে—যার ডাকনাম ভালোবাসা,—আঃ কেন আবার  
একথা, আমি অশরীরী এখন, আমি এখন গীর্জার অন্তরের মতন

পবিত্র বিশেষণ, সমস্ত প্রতীক অগ্রাহ্য করা শ্রেষ্ঠ প্রতীক, এখন  
‘সমাজ’ শব্দটি শুনলে পাট ভেজানো জলের গন্ধ মনে পড়ে, কেউ  
ক্ষিদে পেয়েছে’ বললে মনে হয়, আহা লোকটি বড় নিষ্ঠাবান  
অর্থাৎ ধ্যান, এখন আমার ধ্যান, আর বিস্মরণ নয়, ধ্যান–  
কিন্তু যাই বলো, চারপাশে অঙ্গুরীর নৃত্য না থাকলে চোখ বুঁজে  
ধ্যানও জমে না!

আবার? আস্তে, না, শরীর নয়, আমি এখন আকাশের নিচে  
চুপ করে দাঁড়িয়ে আছি, সমস্ত অন্তরীক্ষ জুড়ে তালগাছের মতন  
দীর্ঘ কোনো কণ্ঠস্বর আমায় বলেছে, দাঁড়াও!  
আমি চুপ করে দাঁড়িয়ে আছি, আমি এ-রকমও জানি,  
চোখে জল এলে বুঝতে পারি, এও তো শরীর, পায়ের ধুলোও শরীরবাদী  
আহা, শরীরের দোষ নেই, সে অশরীরীর সামনে হাত জোড়  
করে দাঁড়িয়ে আছে।

BANGLADARSHAN.COM

# আজ সকালবেলা

মাঠের সামনের ঝুল বারান্দায় শীতের সকালে রোদ এলে

বেতের চেয়ারে আমি কবির মত বসে থাকি

এখন রোদ্দুর দেখে অনায়াসে বলা যায়, 'হেমশস্য'

নারী নয়, বৃক্ষও প্রকৃতি

পাতার ভিতরে হাওয়া 'আন্দোলন' করে যায়

প্রসারিত সবুজের ভিতরে শিশির খোঁজে চোখ

ঠিক কবির মতন চোখ ঘোরে ফেরে আকাশে প্রান্তরে

মাঝে মাঝে বেতের চেয়ারে একা কবি হতে কে না চায়?

মন, তুমি জেনে রেখো, এসবই দেখার যোগ্য সুস্থির শাস্ত

যেমন ভ্রমণে যায় মানুষ ও মানুষের পোশাকের খয়েরি সুটকেস

অর্জিত ছুটির সুখে কলকাতা-আসানসোল তুচ্ছ হয়ে যায়

ইস্পাত শিল্পের কর্মী মন্দিরের শিল্প দেখে কেঁপে ওঠে সর্বাঙ্গ সরবে!

সৌন্দর্য বিখ্যাত জ্ঞান, মাঝে মাঝে চোখ চেয়ে দেখে রাখা প্রথা

হৃদয় কি শূন্য? তবে পাহাড় শিখর থেকে দূরের শূন্যতা দেখে

মানুষের এতখানি খুশী?

ঝর্নার রূপের ছল ক্যামেরায় এসে স্থির হয়

সমূল বৃক্ষের থেকে পরগাছার ফুল বেশী দামী—

এরকমই মিলে মিশে জীবনের সরল ও স্বাভাবিক সার্থক ব্যর্থতা, জেনে রেখো।

মন, তুমি তিরিশ পেরুলে, তাই যুক্তিবাদী?

তুলনা ও প্রতিতুলনার মতো জুয়াচুরি শিখে নিয়ে বাণী উচ্চারণে বুঝি লোভ?

এখন গভীর রাত্রে বাড়ি ফেরা চুপি চুপি গাঢ় অপরাধ?

হাস্যকর মানুষের সামনে এসে এখন বিনীত হাস্য দিতে হবে?

প্রকৃতিকে 'ফ্রকৃতি' না বলে ডেকে, নারীর বুকের প্রতি

জ্বলন্ত নিশ্বাস ছোঁড়া বন্ধ!

ওরে মন্দমতি, আজো শোন

সধর্মে নিধন শ্রেয়, স্নেহসিক্ত পরধর্ম পূতনা রাক্ষসী।

# ধান

হলুদ শাড়ি আর পরো না, এবার মাঠে হলুদ ধান ফেলেনি  
ঘরে তোমার হলুদে পর্দা! মিনতি করি খুলে রাখো

এবার মাঠে হলুদ ধান ফেলেনি।

এপাড়া জুড়ে সানাই বাজে, ওপাড়া জুড়ে শামিয়ানা  
ব্যস্ত মানুষ, সুখী মানুষ, শঙ্খ আর উলুধ্বনি লাল চেলি

সবই থাকুক, বন্ধ রাখো গায়ে-হলুদ

এবার মাঠে হলুদ ধান ফেলেনি

আয় কাক আয় কাকের পাল আয়রে আয়—

গোয়াল ঘরের পাশে দাঁড়িয়ে ছেলেটা ডাকে পুরোনো সুরে  
ও খোকা, তুই কাক ডাকিসনে, ও ডাকা যে অলুক্ষণে

এ-বছর আর নবান্ন নেই, বান এসেছে

এবার মাঠে হলুদ ধান ফেলেনি।

দুপুরবেলা হলুদে হাওয়া উদাস হয়ে ঘুরে বেড়ায়  
কোথায় কেউ কথা বললে রক্ত আলোয় তুফান ওঠে

পায়ের কাছে লুটিয়ে থাকে হিম নিশীথের নীল জ্যোৎস্না

গাছের পাতা হলুদ হয় তবুও ভয়ে

মায়ের মুখ শিশুর মতো, জলে যেমন মেঘের ছায়া, থমথমে ভয়

ও মা, তুমি ভয় পেও না

শিশুর অন্তপ্রাশন হবে অনাদিকালের গোধূলি বেলয়।

# কৃতঘ্ন শব্দের রাশি

চিঠি না-লেখার মতো দুঃখ আজ শিরশির করে ওঠে

আঙুলে বা চোখের পাতায়

নিউ মার্কেটের পাশে হঠাৎ দুপুরবেলা নীরার পদবী ভুলে যাই—  
এবং নীরার মুখ।

জলে-ডোবা মানুষের বাতাসের জন্য হাঁকুপাকু—সেই অস্থিরতা  
নীরার মুখের ছবি—সোনালি চশমার ফ্রেম, নাকি কালো!

স্তম্ভের ঘড়িকে আমি প্রশ্ন করি, সোনালি? না কালো?

ধনুক কপালে বাঁক টিপ, ঢাল চূলে বাতাসের খুনসুটি

তবুও নীরার মুখ অস্পষ্ট কুয়াশাময়

জালে ঘেরা বকুল গাছকে আমি ডেকে বলি

বলো, বলো, তুমিও তো দেখেছিলে?

নীরার চশমার ফ্রেম সোনালি না কালো?

সিঁড়ির ধাপের মতো বিস্মরণ বহুদূর নেমে যায়

ভুলে যাই নীরার নাভির গন্ধ

চোখের কৌতুকময় বিষণ্ণতা

নীরার চিবুকে কোনো তিল ছিল?

এলাচের গন্ধমাখা হাসি যেন বাতাসের মধ্যে উপহাস

বিস্মৃতির মধ্যে শুনি অধঃপতনের গাঢ় শব্দ

নিউ মার্কেটের পাশে হঠাৎ দুপুরবেলা

সব কিছু ভুলতে ভুলতে আমার অস্তিত্ব

শূন্য কিন্তু মগ্ন হয়ে ওঠে—

ছিঁড়ে যায় নীল পর্দা, ভেঙে পড়ে অসংখ্য দেয়াল

হিজল বনের ছায়া চকিতে মেঘের পাশে খেলা করে

তীব্রভাবে বেজে ওঠে কৃতঘ্ন শব্দের রাশি, সেই মুহূর্তেই

চোয়াল কঠিন করে হাত তুলি, বজ্র মুঠি, বলসে ওঠে।

রক্তমাখা ছুরি।

BANGLADARSHAN.COM



# সারা জীবন বেড়াতে এলে

ব্রীজের নিচে মানুষ, তুমি

সারাজীবন বেড়াতে এলে?

ফাঁকা জীবন, হলুদ ঘর, নোংরা জলে মেয়েলি তুলো

শরীরময় টুকরো ছিট, চুলের গন্ধ ঝাউবনের

অসমীচীন মানুষ, তুমি সারাজীবন বেড়াতে এলে?

ঘণায় কাঁপে শরীর আমার, ভ্রমণ এত মাধুরীহীন?

তিরতিরিয়ে রক্ত ছোটে—ভ্রমণ শুনলে জলপ্রপাত

ভ্রমণ শুনলে চুরি-সোহাগ, ভ্রমণ শুনলে রৌদ্রছায়া

নগর ভরা নারীর হাস্য, হীরের গয়না, কালো রুমাল

সহ্য হয় না এমন জ্যোৎস্না, সহ্য হয় না ট্রেনের ঘণ্টা

ব্রীজের নিচে মানুষ তুমি বাদামী মুখ,

সারাজীবন বেড়াতে এলে?

BANGLADARSHAN.COM

## সহমরণ

যেন কাল মরে যাবো ক্ষণকাল সেই কথা ভেবে  
গোধূলির দিকে আমি বিদায়ের অস্ত্র তুলে ধরি—  
গোধূলি কি ফসলের বিবর্তন? নাকি উল্লুকের  
প্রশান্ত নাচের ভঙ্গী? দুঃখ ঝরে রক্তের মতন, ঝরে যায়  
কিংবা রক্ত দুঃখের মতন—যেন কাল মরে যাবো  
ক্ষণকাল সেই কথা ভেবে আমি গোধূলির কাছে

কালো শিল্প শিক্ষা নিতে আসি—

থামে না বাতাস, এত দীর্ঘশ্বাস তোমাকে মানায়?  
বলো বলো, চুপ করে চেয়ে থাকাকবরের পাশে বসা নয়  
মূর্খেরা বিশ্রাম করে ইজেরের ইলাষ্টিক খুলে  
সুখ

ভাঁড়ারে জমানো আছে, যেমন ফুলের কাছে কাঁচাপয়সা  
রোজ বনবনায়  
আমি তার চেয়ে ঢের দূরে, আমি প্রত্যেক উত্তর  
শেখাই প্রেতের কণ্ঠে, প্রত্যেক অনভিপ্রেত মুখ  
গোধূলিকে মান্য করে,—মাথায় ব্যাণ্ডেজ বাঁধা দু'একজন

হাসপাতালে মরে

দু'একজন হাসাহাসি করে যায় বিকেল চারটের রেস্টোরাঁয়  
অতিশয় তেষ্ঠা পেলে কোনো কোনো পাখি ডুব দেয়  
লবণ সমুদ্রে  
এবং ওঠে না।

কি যেন হয়নি শেষ, ঘুমের আবেশে অন্ধকারে  
মনে পড়ে; না মনে পড়ে না, কিংবা মনে-পড়া মনের গহ্বর  
নারীর লজ্জার মতো খুলে যায়, সন্তর্পণে নিজেকে ঠকিয়ে  
দশদিক চেয়ে দেখি, যেন কেউ হঠাৎ না দেখে, যেন চোখ  
বিদায়ের হেমস্তের অপ্রেমের অসুখের বিস্মৃতির ললাট এড়িয়ে  
মহিষ বাহন হয়ে ফিরে আসে, হাসে জ্যোৎস্না ইয়ার্কি মায়ায়—

মন কেন এত খুশী-যেন একই বালিশে দু'জনে মাথা রেখে  
আমি ও আমার মৃত্যু শুয়ে আছি, চুপচাপ, শুয়ে আছি যেন  
একই স্বপ্ন দু'জনে দেখছি।-

BANGLADARSHAN.COM

# আরও নিচে

সিংহাসন থেকে একটু নিচে নেমে, পাথরের

সিঁড়ির উপর বসে থাকি

একা, চিবুক নির্ভরশীল

চোখ লোকচক্ষু থেকে দূরে।

‘সম্রাটের চেয়ে কিছু কম সম্রাটত্ব’ থেকে ছুটি নিয়ে আজ

হলুদ দিনাবসানে পরিকীর্তি শব্দটির মোহে

মাটির মানুষ হতে সাধ হয়। এক-একদিন একরকম হয়।

আমার চোখের নিচে কালো দাগ

ব্যঞ্জেজের মধ্যে একটা পোকা ঢুকলে যে-রকম জাদুদণ্ডসম কোনো

মহিলার মতো

নিয়তি বদল করে, আলো-ছায়া-আলো ঘোরে নিভৃত সানুদেশে

দপ করে জ্বলে ওঠে হৃদয়ের পুরনো বারুদ

তেমনিই দিনাবসান

তেমনিই মোহের থেকে মুক্ত নিচু চাঁদ—

সিংহাসন থেকে নেমে, হাত ভরা পশমের মতো

রোমশ স্তম্ভতা।

পাথরের মতো মসৃণ বেদীর নিচে রক্ষ মাটি, একটু দূরে পায়ে চলা পথ।

সম্রাটের শেষ ভৃত্য চিরতরে যেখানে শয়ান

তার চেয়ে দূরে, সীমার যেখানে শেষ

সেখানে উদ্ভিদ, জল মেতে আছে পাংশু ঈর্ষায়

যেখানে বিশীর্ণ হাত কাদার ভেতর খোঁজ বালির ফসল

তার চেয়ে দূরে

যেখানে শামুক তার খাদ্য পায়, নিজেও সে খাদ্য হয়

ভেসে যায় সাপের খোলস, সেখানেও

আমার অতৃপ্তি বড় দীর্ঘশ্বাস বিষদৃষ্টি নিয়ে জেগে রয়—

মুকুট খোলার পর আমি আরও বহুদূরে নেমে যেতে চাই।

# তুমি

তুমি অপরূপ, তুমি সৃষ্টির যথেষ্ট পূজা পেয়েছো জীবনে?

তুমি শুভ্র, বন্দনীয়, নারীর ভিতরে নারী, আপাতত, একমাত্র তুমি  
বাথরুম থেকে এলে সিক্ত পায়ে, চরণকমলযুগ চুম্বনে মোছার যোগ্য ছিল—  
তিন মাইল দূরে আমি ওষ্ঠ খুলে আছি, পূজার ফুলের মতো ওষ্ঠাধর

আমি পুরোহিত, দেখো, আমার চামর, বাহু স্বতোৎসার শ্লোক  
হৃদয় অহিন্দু, মুখ সোমেটিক, প্রেমে ভিন্ন কোপটিক খৃষ্টান  
আশৈশব থেকে আমি পুরোহিত হয়ে উঠে তোমার রূপের কাছে ঋণী  
তোমার রূপের কাছে অগ্নি, হেম, শস্য হবি-পদাঘাতে পূজার আসন  
ছড়িয়ে লুকাও তুমি বারবার, তখন তন্ত্রের ক্ষোভে অসহিষ্ণু আমি  
সবলে তোমার বুকে বসি প্রেত সাধনায়, জীবন জাগাতে চেয়ে জীবনের ক্ষয়  
ওষ্ঠের আর্দ্রতা থেকে রক্ত ঝরে, নারীর বদলে আমি স্ত্রীলোকের কাছে  
মাথা খুঁড়ি, পুরোহিত থেকে আমি পুরুষের মতো চোখে দ্রুততা ছড়িয়ে  
আঙুলে আকাশ ছুঁই, তোমার নিঃশ্বাস থেকে নক্ষত্রের জন্ম হলে  
আমি তাকে কশ্যপের পাশে রেখে আসি।

এ রকম পূজা হয়, দেখো ত্রিশিরা ছায়ায় কাঁপে ইহকাল

এমন ছায়ার মধ্যে রূপ তুমি রূপের কঠিন ঋণ বিশাল মেখলা

আমি ঋণী আমি ক্রীতদাস নই, আরাধনা মন্ত্রে আমি

তোমাকে সম্পূর্ণ করে যাবো।

# কঙ্কাল ও শাদা বাড়ি

শাদা বাড়িটার সামনে আলো-ছায়া-আলো, একটি কঙ্কাল দাঁড়িয়ে  
এখন দুপুর রাত অলীক রাত্রির মতো, অরণা রয়েছে খুব ঘুমে  
যে-রকম ঘুম শুধু কুমারীর, যে ঘুম স্পষ্টত খুব নীল;  
যে স্তনে লাগেনি দাঁত তার খুব মৃদু ওঠাপড়া  
তলপেটে একটুও নেই ফাটা দাগ, এ শরীর আজও ঋণী নয়  
এই সেই অরণা ও রুনি নামী পরা ও অপরা  
সুখ ও আসুখ নিয়ে ওঠাধর, এখন রয়েছে খুব ঘুমে  
যে-রকম ঘুম শুধু কুমারীর, যে-ঘুম স্পষ্টত খুব নীল।

সন্ন্যাসীর সাহসের মতো শান্ত অন্ধকার, কে তুমি কঙ্কাল-  
প্রহরীর মতো একা, কেন বাধা দিতে চাও? কী তোমার ভাষা?  
ছাড়ো পথ, আমি ঐ শাদা বাড়িটার মধ্যে যাবো।

করমচা ফুলের ঘ্রাণ আলপিনের মতো এসে গায়ে লাগে  
থামের আড়ালে থেকে ছুটে এলো হাওয়া, বহু ঘুমের নিশ্বাস  
ভরা হাওয়া

আমি অরণার ঘুমে এক ঘুম ঘুমোতে চাই আজ মধ্য রাতে  
অরণার শাড়ি ও শায়ার ঘুম, বুকে ঘুম, কুমারী জনের  
পবিত্র নরম ঘুম, আমি ব্রাহ্মণের মতো তার প্রার্থী।

নিরস্ত্র কঙ্কাল, তুমি কার দূত? তোমার হৃদয় নেই, তুমি  
প্রতীক্ষার ভঙ্গি নিয়ে কেন প্রতিরোধ করে আছো?

অরণা ঘুমন্ত, এই শাদা বাড়িটার দ্বারে তুমি কেন জেগে?

তুমি ভ্রমে বদ্ধ, তুমি ওপাশের লাল রঙা প্রাসাদের কাছে যাও

ঐখানে পাশা খেলা হয়, হু-রে-রে চিৎকরে ওঠে হৃদয়ে শকুনির ঝটাপটি,

তুমি যাও

ছাড়ো পথ, আমি এই নিদ্রিত বাড়ির মধ্যে যাবো।

# নিরাভরণ

পায়ে তোমার কাঁটা ফুটেছে, উচ্চাকাঙ্ক্ষা?

তুমি তাহলে পিছনে থাকো

বন্ধু ছিলে উদাসীনতা, তোমারও সাধ গৃহী হতে?

ডাইনে যাও

পোশাক, তুমি ছিন্ন হবে? শান্তি, তোমার তৃষ্ণা পাবে?

জিরোও এই গাছের নিচে

হলুদ বই, শাদা, বোতাম, কৃতজ্ঞতা, চাবির দুঃখ, বিদায় দাও

আমার আর সময় নেই, আমি এখন

পেরিয়ে মজা দিঘির কোণ, প্রণাম করে অরণ্যের সিংহাসন, সামনে ঘুরে

দিগন্তের চেয়েও একটু দূরে যাবো॥

BANGLADARSHAN.COM

## প্রবাসের শেষে

যমুনা, আমার হাত ধরো, স্বর্গে যাবো।  
এসো, মুখে রাখো মুখ, চোখে চোখ, শরীরে শরীর  
নবীনা পাতার মতো শুদ্ধরূপ, এসো  
স্বর্গ খুব দূরে নয়, উত্তর সমুদ্র থেকে যে রকম বসন্ত প্রবাসে  
উড়ে আসে কলস্বর, বাহু থেকে শীতের উত্তাপ  
যে রকম অপর বুকের কাছে ঋণী হয়; যমুনা, আমার হাত ধরো,  
স্বর্গে যাবো।

আমার প্রবাস আজ শেষ হলো, এরকম মধুর বিচ্ছেদ  
মানুষ জানেনি আর। যমুনা আমার সঙ্গী-সহস্র রুমাল  
স্বর্গের উদ্দেশে ওড়ে; যমুনা তোমায় আমি নক্ষত্রের অতি প্রতিবেশী  
করে রাখি, আসলে কি স্বাভাবিক নক্ষত্রের সেই প্রবাদ মাখানো অশ্রু তুমি নও?

তুমি নও ফেলে আসা লেবুর পাতার ছাণে জ্যোৎস্নাময় রাত?

তুমি নও ক্ষীণ ধূপ? তুমি কেউ নও

তুমিই বিস্মৃতি, তুমি শব্দময়ী, বর্ণ-নারী, স্তন ও জজ্বায়

নারী তুমি,

ভ্রমণে শয়নে তুমি সকল গ্রন্থের যুক্ত প্রণয় পিপাসা  
চোখের বিশ্বাসে নারী, স্বেদে চুলে, নোখের ধুলোয়  
প্রত্যেক অণুতে নারী, নারীর ভিতরে নারী, শূন্যতায় সহাস্য সুন্দরী,  
তুমিই গায়ত্রী ভাঙা মণীষার উপহাস, তুমি যৌবনের  
প্রত্যেক কবির নীরা, দুনিয়ার সব দাপাদাপি ক্রুদ্ধ লোভ  
ভুল ও ঘুমের মধ্যে তোমার মাধুরী ছুঁয়ে নদীর তরঙ্গ  
পাপীকে চুম্বন করো তুমি, তাই দ্বার খোলে স্বর্গের প্রহরী।

তুমি এ রকম? তুমি কেউ নও

তুমি শুধু আমার যমুনা।

হাত ধরো, স্বরবৃত্ত পদক্ষেপে নাচ হোক, লজ্জীত জীবন

অন্তরীক্ষে বর্ণনাকে দৃশ্য করে, এসো হাত ধরো।

পৃথিবীতে বড় বেশী দুঃখ আমি পেয়ে গেছি, অবিশ্বাসে



আমি খুনী, আমি পাতাল শহরে জালিয়াৎ, আমি অরণ্যের  
পলাতক, মাংসের দোকানে ঋণী, উৎসব ভাঙার ছদ্মবেশী গুপ্তচর।  
তবুও দ্বিধায় আমি ভুলি নি স্বর্গের পথ, যে রকম প্রাক্তন স্বদেশ।  
তুমি তো জানো না কিছু, না প্রেম, না নিচু স্বর্গ, না জানাই ভালো  
তুমিই কিশোরী নদী, বিস্মৃতির স্রোত, বিকালের পুরস্কার...  
আয় খুকী, স্বর্গের বাগানে আজ ছুটোছুটি করি।

BANGLADARSHAN.COM

# মানে আছে

আচমকা স্রোতের পাশে হেলে পড়া আম বৃক্ষটি

এরও কোনো মানে আছে।

নির্জন মাঠের পোড়োবাড়ি-হা হা করে ভাঙা পাল্লা

এরও কোনো মানে আছে?

ঠিক স্বপ্ন নয়-মাঝে মাঝে চৈতন্যের প্রদোষে সন্ধ্যায়

শিরশিরে অনুভূতি

কি যেন ছিল বা আছে অথবা যা দেখা যায় না

দুরন্ত পশুর মতো ছুটে আসে বিমূঢ়তা

জানলার পর্দাটা দোলে, থেমে যায়, দুলে ওঠে

এরও কোনো মানে আছে।

চুম্বনসংলগ্ন কোনো রমণীর চোখে দেখিনি কি

অন্যমনস্কতা?

চেনা বানানের ভুল বারবার। অকস্মাৎ স্মৃতির অতল

থেকে উঠে আসে গানের দু'একটা লাইন

বারান্দায় পাখিটি বসেই উড়ে যায়

হেমকান্তি সন্ধ্যার আড়ালে

এর কোনো মানে নেই?

॥সমাপ্ত॥